

Utusan Malaysia Selasa 18 April 2017

Ganjaran tambahan RM100,000 kepada peserta menang emas di WSC

KUALA LUMPUR 17 April -Kerajaan akan menganugerahkan insentif tambahan sebanyak RM100,000 kepada mana-mana peserta yang berjaya merangkul pingat emas dalam Pertandingan Kemahiran Dunia (WSC) 2017 di Abu Dhabi, Emiriah Arab Bersatu (UAE) pada 14 hingga 19 Oktober ini.

Timbalan Perdana Menteri, Datuk Seri Dr. Ahmad Zahid Hamidi berkata, tambahan kepada RM40,000 insentif kerajaan yang diperuntukkan untuk pemenang di WSC adalah sebagai galakan kepada peserta untuk menunjukkan

prestasi terbaik dalam pertandingan bertaraf antarabangsa itu.

“Mana-mana peserta yang mewakili Malaysia dalam WSC 2017 dan mendapat pingat emas, kerajaan akan tambah insentif RM100,000. Kalau dapat dua emas lagi baik, dapat lima pun kerajaan akan bagi.

“Kita mesti berada dalam kalangan *world class* dan insentif tambahan ini merupakan satu motivasi kepada mereka untuk menonjolkan pencapaian cemerlang,” katanya ketika berucap dalam majlis Pelancaran *Road To WSC Abu Dhabi 2017 Gold* di sini hari ini.